

Onestamente Bisá

Nos mundu ta mentiroso! Ta bisá ku si tur hende den un instante a kuminsá papia bèrdat, lo tin káos total. Hopi negoshi, organisashon, gobièrno, religion i filosofia lo desaparesé den un será di wowo. Hopi hende lo buska lugá pa skonde.

Nos isla no ta mihó! Gañamentu ta asina komún ku nos ta hañ'é un parti normal di bida. Alumno ta gaña dosente ku e tabata malu pa evitá di traha profwèrk. Komersiante ta gaña konsumidó pa haña mas benta. Hotelero ta duna impreshon falsu pa haña mas turista. Mekániko ta gaña doño di outo ku el a kambia sierto piesa. Abogado ta gaña pa gana e kaso pa su kliente. Dòkter, enfemera, famianan i bishitantenan ta bin ku tur klase di engaño kreativo pa skonde e bèrdat di e pashènt.

Obreronan ta falsifiká kuantu ora nan a traha. Doño di trabou ta pretendé ku e tin problema finansiero i e no por paga mas. E polítiko ta hasi tur klase di promesa pa haña voto, anto ta “lubidá” nan despues di elekshon. Gobernante ta gaña puebel. Suidadano ta inventá sifra pa inkomstenbelasting.

Asta den famia ta falta onestidat. Yu ta gaña mayor, ruman ta gana otro, esposo ta gaña esposa. Mayor ta gaña yu. Si gañamentu tabata un enfermedat, **nos komunidad chikitu lo ta muriendo di e epidemia di mentira!**

Dios no ke pa nos biba asina. **Beibel ta eksigí onestidat.** “...poniendo mentira un banda, kada un di boso papia bèrdat ku su próhimo” (Efesonan 4:25). Un di e Dies Mandamentunan ta bisa bon kla “*No lamta testimonio falsu kontra bo prohimo*” (Eksodo 20:16). **Mentira—tur mentira, kon chikitu òf inosente ku e por parse—ta piká.**

Nos ta duna Dios rason ku gañamentu ta piká ora otro hende ta gaña...especialmente ora nan ta gaña nos. Ma kiko di nos mes? Ta fásil pa mustra dede riba otro hende i kondená nan mentira. Ma abo ta papia bèrdat...tur ora? Laga nos ta franko. **Nos ta saka un mentira tras di otro sin pensa mes. Nos ta gaña otro, gaña riba otro, i gaña pa otro manera nada n' pasa.** Nos ta gaña pa skonde siertu bèrdat, anto ta gaña pa skonde e mentira. Nos ta saka tantu mentira ku tin bes nos mes no sa mas kiko e bèrdat ta.

Hopi biaha nos gaña pasobra nos no tin e kurashi pa bisa un simpel “nò”! Kisas un konosí ta bisábo ku e lo pasa buskábo 7 ‘or. Bo no ke bai, ma ku smak bo ta sigur’é “7’or!” Shet’or bo ta sòru ku bo no ta na kas, òf bo ta manda bo ruman gañ’é ku bo’n t’ei. Sumanesé ora e puntra kiko a pasa, bo tin bo lista mental kla for di kua bo por selektá un mentira apropiá. “Ata, m’a lubida!” “M’a hañámi strobá!” “M’a yega kas lat.” “Mi tabata okupá.” “Mañan si mi por.” Tur ta mentira!

Kuantu bes bo ta sigurá un hende ku bo lo hasi algu p’é mañan, ma mañan nunca ta yega? Mas mentira. Pakiko gaña? Bo por djis bisa “nò”! Dios ta bisa ku nos “si” mester nifiká “si” i nos “nò” ke men “nò” (Mateo 5:37).

Ademas, nos ta siña nos yunan pa gaña fo’i chikitu. Na lugá di bisa e yu pa kita fo’i kaya nos ta gañ’é, “Outo ta bin!” Nos ta spant’é ku “Spiritu!” pa e no keda afó anochi. Of nos ta menasá, “Bo ta haña sota” sin ningun intenshon di kumpli. “Bin tuma” nos ta bis’é ku man blo bashí. Mas mentira. No keda strañá ora bo yu, siguiendo bo ehèmpel, ta bira gañadó kmpion!

Onestamente bisá, **nos ta un komunidad di mentirosonan!** Beibel ta bisa kla ku Dios ta kastigá gañamentu, “*Un testigu falsu no ta keda sin kastigu, i esun ku ta papia mentira no ta skapa*” (Provèrbionan 19:5). “...tur gañadó, nan parti lo ta den e lago ku ta kima ku kandela i swafel...” (Revelashon 21:8).

Ku onestidat, bo’n ta pèrdè. Ma gañando, bo por pèrdè tur kos: bo reputashon, bo konsenshi limpi, i asta bo futuro ku Dios.